

皇

清

經

解

皇

清

經

解

皇清經解卷一千三百七十四

學海堂

經義叢鈔

錢塘嚴杰補編

春秋大事表

無錫顧祭酒棟高著

山西太原府

今太原縣爲古唐國本堯之後裔周成王滅唐以封叔虞分
從舊唐之子孫于許郢之間春秋唐惠侯是其後在今湖
廣隨州西北八十五里叔虞受封因仍其國號曰唐至叔
虞子燮侯始改唐號曰晉

祁縣東南八里有古祁城志以爲晉祁奚邑縣以近祁藪而
得名卽爾雅所謂昭餘祁也

府治陽曲縣東北八十里有大孟城爲祁氏之孟邑昭二十

八年魏獻子爲政分祁氏之田以爲七縣孟丙爲孟大夫
榆次縣有涂水鄉爲晉祁氏之塗水邑魏獻子以知徐吾爲
塗水大夫又縣西北爲晉魏榆邑昭八年石言于晉魏榆
卽此

清源縣爲祁氏之梗陽邑魏獻子以魏成爲梗陽大夫

文水縣東北二十里有大陵城爲祁氏之平陵邑魏獻子以
司馬烏爲平陵大夫

大谷縣東南十五里有漢陽邑縣爲晉陽處父邑又縣東二
十五里有箕城僖三十三年晉人敗狄于箕卽此

平定州

今壽陽縣東南十五里有馬首村爲祁氏之馬首邑魏獻子

以韓固爲馬首大夫

平陽府

今翼城縣治東南十五里有古翼城爲晉穆侯所徙之絳莊
二十六年獻公城絳以深其宮卽此一名翼詩譜云穆侯
遷都于絳孝侯改絳爲翼獻公又北廣其城方二里命之
曰絳則翼與絳爲一地成六年景公遷新田仍謂之絳因
更名翼爲故絳

曲沃縣治西南二里爲晉新田成六年景公遷都于此亦謂
之絳自此以後傳文所書絳皆新田之絳矣又縣西三十
五里有汾水縣南五里有澮水所謂有汾澮以流其惡澮
水一名少水

又縣西三十里有汾水爲晉汾隰地桓三年曲沃武公伐翼
次于陘庭逐翼侯于汾隰獲之卽此

府治臨汾縣東北三十七里有高粱城爲晉高粱地僖二十
四年晉公子重耳入國使殺懷公于高粱卽此

又府城西北有狐谷亭孔氏以爲卽晉之狐厨邑僖十六年
狄侵晉取狐厨受鐸涉汾及昆吾蓋府城西二里卽通汾
水是時狄自西來薄平陽境狐厨受鐸在汾之西而昆吾
則在汾東故涉汾而後及昆吾也

又府治東爲晉平陽邑故堯都春秋時係羊舌氏邑昭二十
八年魏獻子分羊舌氏之田以爲三縣謂平陽楊氏及銅
鞮也趙朝爲平陽大夫卽此

洪洞縣東南十八里有古楊城舊爲楊侯國應劭曰伯僑自
晉歸周封于楊晉滅楊以賜羊舌肸爲楊氏邑襄二十九
年傳女叔齊謂虞虢焦滑霍楊韓魏皆姬姓而晉滅之是
也魏獻子分其地以僚安爲楊氏大夫

霍州西十六里有古霍城舊爲霍叔處封國閔元年晉獻公
滅之後爲先且居封邑一名霍人襄十年晉悼公滅偏陽
使周內史選其族嗣納諸霍人霍名霍人猶直伯柄之後
爲直人也

又州西三里有呂鄉州西南十里有呂城蓋皆以呂飴甥所
居得名後以賜魏錡故復有呂錡呂相之稱

蒲州府

今臨晉縣東北十五里有郇城舊爲郇國文王子所封左傳
所謂畢原豐郇詩所謂郇伯勞之者也亦曰荀桓九年荀
侯賈伯伐曲沃汲郡古文晉武公滅荀以賜大夫原氏黷
是爲荀叔成六年晉人謀去故絳諸大夫皆曰必居郇瑕
氏之地卽此

案郇城亦曰瑕城本一地故左氏連屬言之此所謂河北
之瑕也僖三十年燭之武曰許君焦瑕朝濟而夕設版焉
則在河之南杜註焦瑕晉河外五城之二邑今河南陝州
南二里有焦城陝州西南三十二里有曲沃城曲沃卽瑕
也文十三年晉人使詹嘉處瑕以守桃林之塞崔浩以爲
詹嘉處此備秦以曲沃之官守之故謂瑕爲曲沃桃林爲

今潼關然則瑕非河北之瑕曲沃亦非桓叔所封之曲沃也戰國策每以焦曲沃並稱如左氏之言焦瑕蓋曲沃卽瑕之明證文十二年秦師夜遁復侵晉入瑕高江村以爲秦已渡河而西必不能復深入東渡其爲河外甚明駁辨可謂精且審矣

又縣東南十八里有解城爲晉解梁邑惠公賂秦以河外列城五內及解梁城卽此

又縣東南有白衰城東南十八里有桑泉城僖二十四年晉公子濟河圍令狐入桑泉取白衰卽此

猗氏縣西十五里有令狐城西北有廬柳城僖二十四年晉師軍于廬柳退軍于郇郇在臨晉蓋與猗氏接壤也文七

年晉敗秦師于令狐至于刳首通典陝西同州郃陽縣有
刳首水在河之西土會于此奔秦猗氏縣爲秦晉通衢與
秦以河爲界

又縣南二里有王官故城爲晉王官邑文三年秦伯伐晉取
王官及郊郊亦平陽臨晉間小邑裴駟注史記以王官在
陝西澄城縣非也本傳上云濟河焚舟下云自茅津濟所
取之地在河之東無疑高氏辨之審矣

又縣南二十里有鹽池左傳謂之鹽成六年晉謀去故絳皆
曰必居郇瑕氏之地沃饒而近鹽杜註鹽鹽也猗氏縣鹽
池是也宋志引池而化者周官所謂鹽鹽煮海煮井煮鹹
而成者周官所謂散鹽

府治永濟縣東南五里有蒲坂城爲晉河曲文十二年晉人秦人戰于河曲杜註在河東蒲阪縣南是也僖二十四年子犯從重耳反國及河以璧授公子請亡卽其處又是年濟河圍令狐文三年秦伯伐晉濟河焚舟文十三年晉魏壽餘誘士會秦伯師于河西魏人在東旣濟魏人譟而還皆其地也蓋此爲秦晉東西往來渡河通道故凡濟皆不言其地名他如自茅津濟自南河濟則兵行詭道故特舉以見之左傳文法如此其地在今華陰縣潼關以東河水自此折而東故謂之河曲爲秦晉交界之地

又府治南三十六里有羈馬城爲晉羈馬邑文十二年秦伐晉取羈馬卽此在河之東杜佑以爲在陝西郃陽縣非是

又府治東南有首山卽首陽山靈輒餓處

又府治東北二十八里有涑水城卽秦所伐之涑川

解州

今平陸縣東北六十里有古虞城爲春秋時虞國武王封周章弟虞仲于此又縣東北五十里爲虞顛軫阪東北二十五里爲虞鄭邑東五十里有砥柱山山有三門僖二年晉假道于虞曰冀爲不道入白顛軫伐鄭三門卽此

又縣東五十里有大陽城大陽東北三十里爲虢下陽城其地有虞阪之險晉欲伐虢慮虞人要而擊之攻虞則虢又救之蓋虞虢之門戶滅下陽而兩國皆失其險

又縣西爲晉茅津亦曰大陽津以在大河之北也河之南爲

陝州乃黃河津濟處

芮城縣北五里爲春秋時魏國閔元年晉滅之以賜畢萬爲魏氏文十三年使魏壽餘僞以魏叛者以誘士會秦伯師于河西魏人在東旣濟魏人譟而還蓋魏地逼河與秦以河爲界詩譜云南枕河曲北涉汾水是也

又解州鹽池東有苦成故城爲晉卻犇邑謂之苦成叔

安邑縣東南有中條山又縣北三十里有鳴條岡爲晉條邑桓二年傳晉穆侯以條之役生太子當係此地孟子曰舜卒于鳴條卽此舊以爲在直隸河間府景州漢周亞夫所封晉在春秋前其地不宜至此當誤

絳州

今聞喜縣東二十里爲桓叔所封之曲沃歷莊伯武公國之
三世凡六十七歲滅晉後仍爲別都一名下國有武公之
廟在焉凡外來公子入立及君薨而殯皆于曲沃武公之
廟重耳及成公悼公卽位皆朝于武宮文公卒殯于曲沃
是也曲沃距翼城縣之故絳凡二百里正義曰國君五日
而殯文公以巳卯卒明日庚辰柩卽出絳蓋以曲沃路遠
詳見都邑

又縣東北三十五里有董氏陂產楊柳可爲箭卽所謂董澤
之蒲也

河津縣東有冀亭舊爲冀國地杜註冀國并于虞虞亡歸晉
晉惠公以與卻芮爲食邑芮被誅邑復入晉後其子卻缺

晉侯白狄子有功復與之冀

又縣南十二里有古耿城爲春秋時耿國地閔元年晉滅之

以賜趙夙爲邑

絳州界有賈鄉爲春秋時賈國地桓九年荀侯賈伯伐曲沃

後不知何年滅之以賜狐偃子狐射姑爲邑

垣曲縣西北六十里有臯落鎮爲東山臯落氏國閔二年晉

侯使太子申生伐東山臯落氏杜註赤狄別種又縣東南

有陽壺城南臨大河爲晉瓠邱地襄元年晉悼公以宋五

大夫在彭城者寘諸瓠邱杜註在河東垣縣東南又縣東

有邵亭爲晉之鄆邵邑一名鄆文六年趙孟殺公子樂于

鄆襄二十三年齊侯伐晉成鄆邵杜註取晉邑而戍之蓋

三名爲通稱矣

稷山縣西北二十里爲晉清原地一名清僖三十一年晉蒐于清原作五軍以禦狄宣十三年赤狄伐晉及清成十八年悼公入國大夫逆于清原皆此地

吉州

今州治東北二十一里有北屈廢縣爲晉北屈邑莊二十八年晉獻公使夷吾居屈又晉有屈產之乘案傳二五言于公曰狄之廣莫于晉爲都知蒲屈向日皆狄地矣

又州西有晉采桑津僖八年晉里克敗狄于采桑卽此

陽州

今州治北四十五里有蒲陽故城在蒲水之北卽重耳所居

之蒲邑又州境有晉交剛地成十二年晉人敗狄于交剛
卽此

永和縣南十里有樓山城爲晉趙嬰齊食邑左傳謂之樓嬰
潞安府

今潞城縣東北四十里有古潞城爲赤狄潞氏國都按潞氏
國爲最大封境極廣國都在潞安據晉之腹心而其邊邑
則在今直隸廣平府之曲梁延袤二省宣十五年傳荀林
父敗赤狄于曲梁遂滅潞蓋師反出其東而轉攻之所以
絕其奔逸滅潞之歲秦師東來晉侯別遣魏顆以偏師禦
之而身留治兵于稷以略狄土其用力亦勤矣明年又遣
士會滅甲氏留吁鐸辰以盡其餘黨留吁鐸辰俱在今潞